

五法退菩提

出涅槃經 (12-17-1919)

- 一、樂在外道出家。謂人之出家。當從正法。修習善業。成菩提果。若從外道。則增諸邪見。作不善業。而菩提之心。未有不退失者矣。(梵語菩提。華言道。)
- 二、不修大慈之心。謂修菩薩行者。當以平等大慈之心。愛念一切眾生。與其清淨法樂。然後得成菩提之果。若非此行。而菩提之心。未有不退失者矣。
- 三、好求法師過罪。謂修菩薩行者。奉承師長。如事父母。聽受其教。則菩提之果可成。若窺伺以求其過。則不惟無聽受之誠。且虧事師之道。而菩提之心。未有不退失者矣。
- 四、常樂處在生死。謂修菩薩行者。當勤精進以求出離。則菩提之果可成。若耽著五欲。造諸惡業。於諸生死。心無厭離。而菩提之心。未有不退失者矣。(五欲者。色欲。聲欲。香欲。味欲。觸欲也。)
- 五、不喜讀誦經典。謂修菩薩行者。當信受如來所說經典。誠心讀誦。求其妙義。依解進修。成菩提果。若不喜樂受持讀誦。則所修之行無所依據。而菩提之心。未有不退失者矣。

五不退

出起信論疏 (12-17-1919)

- 一、信不退。謂十信位菩薩。發大信心。篤信中道圓妙之理。常住平等。不遷不變。信行滿足而無退轉也。(十信者。信心。念心。精進心。慧心。定心。不退心。護法心。回

向心。戒心。願心也。）

二、位不退。謂菩薩十信滿足。入十住位。乃至十行十回向位。即得分見法身。住正定位而不退轉也。（十住者。發心住。治地住。修行住。生貴住。方便具足住。正心住。不退住。童真住。法王子住。灌頂住。十行者。歡喜行。饒益行。無瞋恨行。無盡行。離癡亂行。善現行。無著行。尊重行。善法行。真實行也。十回向者。救一切眾生離眾生相回向。不壞回向。等一切佛回向。至一切處回向。無盡功德藏回向。隨順平等善根回向。隨順等觀一切眾生回向。真如相回向。無縛解脫回向。法界無量回向也。）

三、證不退。謂菩薩三賢位滿。即入初地。乃至七地。證遍滿法身。生無邊佛土而不退轉也。（三賢者。即十住十行十回向諸位菩薩也。初地至七地者。歡喜地。離垢地。發光地。焰慧地。難勝地。現前地。遠行地也。遍滿法身者。謂法身之體。遍滿一切處也。）

四、行不退。謂菩薩七地功德滿足。入於第八無功用地。一切功行永無退失也。（第八無功用地。即不動地也。）

五、煩惱不退。謂菩薩十地滿足。入等覺位。了煩惱即是菩提。豈更有煩惱之可退轉也。（十地者。即前七地更加不動地。善慧地。法雲地。是為十地也。等覺位者。去後妙覺佛猶有一等。勝前諸位。得稱為覺。）